

ԱՇՈՒՂ ՋԻՎԱՆԻ. Անհայտ երգեր, աշխատասիրությամբ Թովմաս Պողոսյանի, Երևան, «Լուսակն» հրատ., 2009, 670 էջ:

Երաժշտագետ Թովմաս Պողոսյանը հայագիտության դատին է հանձնել «Աշուղ Ջիվանի. Անհայտ երգեր» ընդհանուր խորագրով աշխատությունը: Դրա առաջին մասը նվիրված է Ջիվանու անտիպների պատմաբանասիրական հետազոտությանը, իսկ երկրորդ մասն ընդգրկում է մեծ աշուղի անտիպ ստեղծագործությունների ամբողջական ժառանգությունը՝ մոտ 420 երգ ու բանաստեղծություն, որոնց ձեռագրերը պահվում են Ե. Չարենցի անվան գրականության և արվեստի թանգարանի՝ Ջիվանու անունը կրող համապատասխան ֆոնդերում: Ուսումնասիրության խմբագիրն է բանագետ, բանասիրական գիտությունների թեկնածու Ալվարդ Ղազիյանը:

Սույն աշխատանքը բաղկացած է առաջաբանից, ներածությունից, վեց գլխից, եզրակացություններից, Ջիվանու «Անհայտ էջերից»: Կցված են հավելված (անավարտ ստեղծագործություններ, պատառիկներ), ծանոթագրություններ, Ջիվանու ստեղծագործությունների համահավաք մատենագիտական ցանկ, հատուկ անունների բառարան:

Առաջաբանում ներկայացված են ժողովածուի կազմման սկզբունքները: Երգերը դասակարգված են այբբենական կարգով: Երգի ստեղծման ժամանակը, տեղը նշված է յուրաքանչյուր ստեղծագործության վերջում: Սկզբնաղբյուրների պահպանման վայրի մասին անհրաժեշտ տեղեկությունները զետեղված են աղյուսակում և ծանոթագրություններում: Ներածության մեջ Թ. Պողոսյանն իրավացիորեն հիմնավորում է Ջիվանու անտիպ երգերի ուսումնասիրության ու տպագրության մշակութաբանական անհրաժեշտությունը, որը հիմք կլինի հայ տոհմիկ ազգային երգի հետագա գոյության ու զարգացման համար: Ջիվանու անտիպների հետազոտությունը հեղինակը կատարում է համեմատական մեթոդով:

Առաջին գլխում հեղինակը ներկայացնում է Ջիվանու կյանքը և նրա անտիպ ժառանգության հետ կապված մանրամասներ:

Երգ ու նվագի նկատմամբ սերը վաղ է արթնանում պատանի Ջիվանու (Մերոբ Լևոնյան, ծնված 1846 թ. Ջավախքի Կարծախ գյուղում՝ Քասենից գաղթած Բենկոյենց Գասպարի ընտանիքում) հոգում: Վեց տարեկանում որբացած տղան ապրում է հորեղբոր խնամքի տակ՝ որբի դառը ճակատագրով, ու մորը, կարիքից դրդված, ամուսնացրել էին ուրիշ գյուղում: Նա սիրով և ուշադրությամբ էր լսում Կարծախ այցելած աշուղների երգերն ու զրույցները: Ջիվանու հոգում հետզհետե ամրապնդվում է աշուղ դառնալու ցանկությունը, ու ինքն էլ է սկսում երգեր հորինել: Նա հինգ տարի աշակերտում է համապողբացի աշուղ Սիալուն, հմտանում աշուղական երգարվեստի մեջ: 1864 թ. Ջիվանին հորեղբոր հետ ճանապարհորդում է լինում Թիֆլիսում, Ալեքսանդրապոլում: Նա Կարծախ այցելած երիտասարդ աշուղ Սազայու հետ համագործակցում է յոթ տարի, աշխատում են նաև Թիֆլիսում: 1871 թ. ալեքսանդրապոլցի սրճարանատեր Տալոյանները Ջիվանուն հրավիրում են Ալեքսանդրապոլ՝ իրենց սրճարանում երգելու: Այդ հրավերը ճակատագրական դեր է կատարում Ջիվանու կյանքում: Ջիվանին ջերմ ընդունելության է արժանանում Ալեքսանդրապոլի հասարակության կողմից, կապվում է Շիրակի մայրաքաղաքի հետ, ընտանիք կազմում՝ 1872 թ. ամուսնանալով Տալոյան Հովհաննեսի դստեր՝ Աշխենի հետ, զավակներ ունենում: Հայ իրականության մեջ նա առաջին անգամ Ալեքսանդրապոլում կազմակերպում է Շիրակի 25 հայ աշուղներին միավորող կազմակերպություն, ընտրվում նրանց ավագը: Ապա բացում է աշուղական դպրոց, որտեղ ուսուցանվում էին ոչ միայն աշուղական արվեստին տիրապետելու հմտությամբ:

յուններ, այլև՝ գլխավորապես մայրենի լեզվով երգելու, հայկական ժողովրդական երգարվեստի ավանդներով առաջնորդվելու կարողություն, մի երևույթ, որով և սկզբնավորվեց հայ աշուղական երգարվեստի դպրոցը, որի փայլուն ներկայացուցիչն ինքը՝ Ջիվանին էր: Աստիճանաբար ամբողջանում է Ջիվանու՝ աշուղ-երգչի դիմանկարը՝ իբրև մշակութային, հասարակական նշանակալից գործչի:

Թ. Պողոսյանի երկարամյա որոնումները հանգեցրին այն եզրակացության, որ անվանի աշուղի ստեղծած ու մեզ հասած տպագիր ու անտիպ երգերի թիվը հասնում է 1180-ի, որից 400-ից ավելին՝ անտիպ: Աշուղագետն իրավամբ գտնում է, որ Ջիվանին պետք է գնահատվի ու արժևորվի ըստ ամենայնի իր բոլոր ստեղծագործություններով, լինեն դրանք տպագիր, թե անտիպ, թարգմանություն, թե փոխադրություն:

Աշխատության երկրորդ գլխում հանգամանորեն քննված են Ջիվանու անտիպ ժառանգության պատմահայրենասիրական, հայրենապաշտական բնույթի երգերը: Դրանք վերաբերում են հայրենիքի վաղեմի փառքին, նրա անձնվեր քաջ հերոսներին, վերջիններիս ոգեկոչմանը, իրենց կյանքը հայրենիքի ազատագրության սեղանին դրած նորոքյա հերոսներին, հայրենասեր, ազգի միաբանության ջատագով հոգևորականներին: Ջիվանին կոչ է անում ապավինել սեփական ուժերին և զենքի ուժով պաշտպանել հայրենիքը:

Երրորդ՝ «Դավանանքը, մարդը Ջիվանու անտիպ ստեղծագործություններում» գլխում վեր է հանվում Աստծուն, աստվածայինին, կրոնին ու հավատքին նվիրված երգերի փիլիսոփայական, բարոյագիտական ու ազգամիավորման նշանակությունը, դրանց գեղարվեստական ու ճանաչողական արժեքը:

Աշխատանքի չորրորդ գլուխը կոչվում է «Ժամանակը և աշուղը»: XIX դարի վերջին և XX դարի սկզբին տնտեսական նոր հարաբերությունների հաստատումը իր հետ բերում է բարոյական արժեքների գնահատման նոր չափանիշներ: Ջիվանին ապրել ու ստեղծագործել է մայր ժողովրդի պատմության արտակարգ բարդ, հակասություններով խճճված ողբերգական այդ դարաշր-

ջանում: Ժամանակը Ջիվանին գնահատում է իր՝ քրիստոնեական դավանանքի բարոյականության չափանիշներով, իսկ աշուղը նրա համոզմամբ պետք է լինի ազատ, անկախ, անկաշկանդ, ենթարկվի ի վերուստ իրեն շնորհված ձիրքին, անսա իր հոգու կանչին և խղճի ձայնին, լինի բարու ու սիրո թարգման:

Հինգերորդ գլուխը նվիրված է «Միրո, խրատական և այլ անտիպ երգերին»: Աշուղի համար կյանքն առանց սիրո գոյություն չունի: Ջիվանին սերը երգում է մարդուն բնորոշ զգացումների ողջ բազմազանությամբ՝ սեր կնոջ, բարեկամի, ծնողների, զավակների, ընկերոջ ու կյանքի ընկերուհու հանդեպ:

Աշխատության վեցերորդ գլխում Թ. Պողոսյանը դիտարկումներ է անում Ջիվանու անտիպ ժառանգության գեղարվեստաարտահայտչական միջոցների վերաբերյալ, մեկնաբանում է նրա կողմից բանահյուսական սյուժեների՝ գրույցների, առակների աշուղական տաղաչափության կանոններով վերաստեղծած հյուսվածքները: Ջիվանու մեծագույն ծառայությունն այն է, որ հիմնադրեց և զարգացրեց հայ աշուղական երգարվեստի ազգային դպրոցը: Իրավացի է աշուղագետ-երաժշտագետ Մ. Մանուկյանը՝ գրելով, թե «Հայ աշուղական երգարվեստում Ջիվանին եղավ առաջիններից մեկը, որ ապավինելով գրական լեզվին, իր երգերի համազգային մատչելիությունն ու տարածումը ապահովեց» (էջ 97)¹:

Ջիվանու ստեղծագործական ուղին համընկել է կյանքում և մշակույթի մեջ կատարվող խոր փոփոխություններին: Աշուղական երգարվեստի տաղաչափական կանոնների հմուտ գիտակը նոր ժամանակների խմորումներն արտացոլել է իր երգերում: Ավանդապահ ու ներհուն Ջիվանին չէր կարող ձևացնել, թե անտակ-անհատակ հոգսերից անհաված է իր ժողովուրդը և խնդիր չունի աշխարհի հետ:

1905 թ. Ռուսաստանում ծավալված հեղափոխական շարժման արձագանքը հասել էր նաև Անդրկովկաս: 1905-1906 թթ. կո-

¹ Ջ ի վ ա ն ի. Զայնագրյալ երգարան, աշխատասիրությամբ Մանուկ Մանուկյանի, Երևան, 1998, էջ 2:

տորածների ալիքը տարածվել էր Հայաստանում: Իր երգերում Ջիվանին պարսավում է թուրք-թաթարական ազգայնամոլ տարրերի հրահրած կոտորածները խաղաղ աշխատանքով զբաղված հայերի նկատմամբ, ջատագովում դիմադրական մարտերի հայ հերոսներին՝ Համագասպին, Մելիքին, Մարտիրոսին, Կյուրեղին, Ասատուրին, Թադևոսին, Տիգրանին, Մուշեղին, Հայրոյին, Մուսային, Կնյագին և այլոց, բացահայտում ցարական Ռուսաստանի ու եվրոպական դիվանագիտության աչառու խաղերը, որոնք, ցավոք, աղերսվում են նաև այսօրվա աշխարհաքաղաքական բարդ գարգացումներին: 1906 թ. Թիֆլիսում գրած «Հեշտ չէ» վերնագիրը կրող խաղում Ջիվանին «բիրտ այպ ու ծանակ, գարշ ամոթանք» տարած իր ժողովրդին մխիթարում է ապագայի հույսով:

Այսքան նեղություն, վիշտ, տառապանք
տանհիլը հեշտ չէ,
Երկար ժամանակ խիստ հալածանք տան
նիլը հեշտ չէ,
Մենք լեզու չունինք, բռնակալը՝ խիղճ
ու մտածմունք,
Բարձր տեղերից արհամարհանք տանհիլը
հեշտ չէ (էջ 132):

Խորապես ըմբռնելով հայ ժողովրդի քաղաքական վիճակը և հատկապես սուլթանական Թուրքիայի ճիրաններում հոշոտվող հայության վիշտը՝ հայրենասեր աշուղը «Դասիթան» կոչվող երգում դարավոր պայքարի ու մաքառումների պատմությունը խտացնում է խոր հուզականության և ուժեղ ընդհանրացումների մեջ:

Քեզնից դժգոհ եմ, բաղդի թագավոր,
Ինչո՞ւ առաջինը վերջին արիւր դու,
Արևելյան փայլուն աստղը գորավոր,
Կտրատեցիր, կիսալուսին արիւր դու
(էջ 587):

Աշուղ Ջիվանին, իհարկե, դեմ է ազգերի միջև գծտություն սերմանող քարոզչությանը, «Իվերիա» լրագրի հայաստյաց գործունեությանը և չի կարող աչք փակել մեր հավատակից վրացիների բազմանշանակ դիվանագիտական խաղերի վրա:

Հատկանշական է հայ հայտնի երգիծաբան Կ. Մելիք-Շահնագարյանի (Տմբլաչի Խաչան) և Ջիվանու՝ նույն ժամանակաշրջանին վերաբերող մտահոգությունների ընդհանրությունը հայ-վրացական հարաբերությունների շուրջը: Տմբլաչի Խաչանը ևս մեր հարևաններից չի ակնկալում քաղաքական առաքինության և ոչ մի դրսևորում՝

«Բաղդի թագավորից դժգոհ» Ջիվանին, այնուամենայնիվ, բախտավոր մարդ էր: Նա ապրեց իր ժողովրդի կյանքով, հավատաց նրա լուսավոր ապագային, հուսադրեց նրան, որ «ձախորդ օրերը կուգան ու կերթան», խարազանեց տգիտությունը, անարդարությունը և հոռի բարքերի հետևորդներին խրատեց՝ «Խելքի աշեցե՛ք»: Ջիվանին գովերգեց լուսավորությունը, ստեղծեց աշուղական իր ազգային դպրոցը, երգեց մաքուր ու անաղարտ սերը՝ «Նագելուս ամպ է իջել»...

Ջիվանին ունեցավ Գարեգին Լևոնյանի նման արվեստաբան որդի, ով դարձավ իր հոր տպագիր ժառանգության առաջին արժանի ուսումնասիրողը³, իսկ ՀՀ վաստակավոր արտիստ, աշուղագետ Թովմաս Պողոսյանի անձնադիր նվիրումով Ջիվանու «Անհայտ երգերը» մեկընդմիջ թողափեցին մոռացության փոշին և ստացան իրենց հավասարազոր գիտական գնահատությունը՝ առավելագույնս ճշտելով ժողովրդական երգիչ, փիլիսոփա, բարոյագետ Ջիվանու տեղն ու դերը հայ աշուղական մշակույթի վեցհարյուրամյա պատմության մեջ:

ԹԱՄԱՐ ՀԱՅԳԱՊԵՏՅԱՆ

² Թ. Հ ա յ ր ա պ է տ յ ա ն. Կ. Մելիք-Շահնագարյանի (Տմբլաչի Խաչան) կյանքն ու գործը. – Հայ ազգագրություն և բանահյուսություն, հ. 24, Երևան, 2007, էջ 63, Տ մ բ լ ա չ ի Խ ա չ ա ն. Զուռնա-Տմբլա, գ. Բ, Վաղարշապատ, 1908, էջ 233:

³ Գ. Լ և ն յ ա ն. Աշուղների մասին, Պատմական-բնական հայացք. – «Ազգագրական հանդես», գ. X, Թիֆլիս, 1903, Ա շ ու ղ Ջ ի վ ա ն ի. Երգերի ժողովածու, ներածական տեսությամբ, ծանոթագրություններով և խմբագրությամբ Գ. Լևոնյանի, առաջաբանը՝ Գ. Վանանդյանի, Երևան, 1936: